

aut a S. Thoma Aquinate, aliisve præcipue Catholicis adfertur: Nempe Regnum Christi, aut Ecclesiam Dei significat, quam constituunt tam viventes, quam mortui in Christo; aut quod aliis veri videntur similis, Ecclesiam dumtaxat triumphantem in Coelis, quam Iusti post Christi mortem ac ascensionem implere cœperunt, & augebunt, usquequo humanis rebus finem imponat gloriosus Christi iudicaturi Adventus: Neque enim aliud *Mille annorum numerus* significat, ut SS. Patres docuerunt, nisi tempus ab initio Ecclesiæ futurum usque ad finem Mundi. Dum fluit hoc tempus, *Animæ decollatorum propter testimonium Jesu regnant & regnabunt cum Christo*. Nisi vim facere velis verbis Apostoli negare, nequeas, quin ille nobis exhibeat sanctos regnantes, non viventes in terris, sed jam morte præreptos; & quam *Animas* ait, satis indicat, se de iis agere, qui nondum per resurrectionem in fine Mundi eventuram, corpora resumerint. Atqui eiusmodi Sanctorum Animæ *regnaturæ* dicuntur *cum Christo*, idest futuræ tanquam Reges, donec supremi Judicii dies adveniat: quid aliud, quæso, rite interpretari possis, nisi magnificam eorum Gloriam in Coelis, exemplo a terrenis, Regibus deducto, qui supra ceteros mortalium splendere, felicesque esse putantur? Quod præsertim de Sanctis verum sit necesse est; quando *regnare* dicuntur *cum Christo*, quem certo novimus esse in *Gloria Dei Patris*. Addit S. Johannes: *Beatus & Sanctus, qui habet partem in Resurrectione prima: in his secunda mors non habet potestatem*. Ergo duplicem Resurrectionem Johannes nobis exhibet. Prima Justos morientes tantummodo respicit, quorum Animæ e mortali ac terrena habitatione hac emigrantes, ad immortalitatem & beatissimam in Coelis vitam resurgunt. Altera deinde Resurrectione erit Iustis, quum in excidio Mundi Corpus resumentes, illud quoque ad immortalitatem ac Beatitudinem, judicante & jubente Christo, perducent. Duplicem similiter *mortem* Apostolus statuit. Prima mors tam Iustis, quam Improbis continget, quum nempe Anima separatur a Corpore. Mors altera, quum Impiorum Animæ una cum Corpore in æterna supplicia tradentur; quæ *Mors secunda potestatem non habet in eos*, quibus *Resurrectio prima* donata est. Dilucide vero innuit S. Jo. quid futurum sit post, *Mille annos*, dum subdit: *Et quum consummati fuerint Mille Anni, solvetur Satanus de carcere suo, & exibit, & seducet gentes. Habes heic dies Antichristi. Et vidi mortuos magros & pusillos, stantes in conspectu Throni. Et libri aperti sunt. Et iudicati sunt mortui ex his, quæ scripta erant in libris secundum opera ipsorum*. En postremum ac solemne Christi Judicium in fine Mundi, toties in Voluminibus deprædicatum. Atque illud, non ante Mille Annos, ut Millenarii somniarunt, sed post, *Et Infernus & Mors missi sunt in stagnum ignis. Hæc est mors secunda*. Ecce Christi Judicis sententiam: *Ite in ignem æternum*, quæ in Peccatoribus completur. *Et vidi Cælum novum &c.* Heic Cœlestis Patria, plenaque & perfecta Beatitudo Iustis conferenda in Coelis describitur, ad quam Iustorum Animæ cum Corpore